

編號 4 號

【行出第一步】劉懿玲原作

人生有當多个「第一擺」，比將講還細時節第一擺騎自行車、第一擺蹶大山，出社會過後第一擺尋頭路、面試。第一擺總係分人印象當深，因爭「萬事起頭難」，愛行出第一步無恁該，需要當大个勇氣同決心。

佢印象盡深个第一擺，係參加演講比賽。在參加比賽前佢就在網路頂看過別人比賽个影片，想講人家仰恁慶，在臺頂講到口涎波潑完全毋會緊張？乜問自家：「佢敢做得著？」老古人講「敢去就一擔樵，毋敢去就屋下愁」，該央時佢單淨一個「毋怕，挑戰看啊」个想法，就慇慇四个報名落去。

準備比賽个過程，心情就像洗三溫暖樣仔，表現好就歡喜靈天，表現差該下嘎又額結結仔當慍悴。正開始練習个時節，單淨企在臺頂講兩句話就緊張到激激顫¹，成時還講到迪迪凸凸、結舌締確。有一擺練習，佢在臺頂講無一分鐘，續下來愛講麼个全部毋記得淨淨，就恁樣在臺頂「罰企」到鈴仔響正下臺。下臺个時節佢敗勢到面紅濟炸，見笑到尋無空好園，實在有罅慘啊！

人講「人愛人打落，火愛人燒著」，經過這擺失敗个經驗，佢同自家講定著愛較增志兜仔，做毋得過發生共樣个情況。想起指導佢个先生識講過：「準備个過程若係每步行來實實疊疊，自然上臺就毋會緊張。」故所佢開始調整自家準備个方法，多看新聞同文章、多聽別人个經驗摻見解、多寫演講稿仔、多練習企在臺頂講話，還過練習過後有問題就多問、多請教。就恁樣一步一腳跡，漸漸仔試著自家个表現有息把仔進步，上臺毋會過恁緊張也。

總算，到咧上臺比賽這最關鍵个一步，俗話講：「臺上三分鐘，臺下十年功。」雖然佢無花到十年个時間，毋過因爭有平常个煞猛練習做基礎，分佢在臺頂講來順順序序、自信淦淦。

在講煞下臺行禮該一瞞目，吾腦膈肚想起一幕幕自開始準備到這下一路項練習个畫面。過程中有辛苦、懊惱，也有快樂、歡喜，不管比賽个結果仰般，好在該央時決定行出第一步來報名參加比賽，這擺寶貴个經驗定著會變做佢未來生活个養分！

¹ 激激顫：音 gid gid zun'；發抖。

編號 5 號

【山薑花】詹陽期原作

去山頂个該條細山路開在山壠肚，彎彎幹幹，左手片係柑園，正手片係一條大圳溝，大約有一尋闊，兩尺深。溝背係壁磴个山排，溝肚生有一大畝¹个山薑花。

細人仔時節，見擺行對這條路過，若係看著有開花，就想同佢拗下來。佢兜無帶刀仔，就尋石牯擲地泥，破析个石片同佢接利利準刀仔用。成半下還會堵著守護這兜山薑花个蛇趟出來，正經會嚇死佢這兜叔伯兄弟。

山薑花个葉一皮長長，莖有手指公恁粗，拗三四莖仔轉去，尋一隻玻璃盞仔，撈水裝捻插落去，做得看靚幾下日。雖然無盡香，毋過在星光半夜，做得略略仔鼻著該清香个味道。

成時細孺仔手賤，同墨水汀落插花个盞仔肚，水會小可變色，加兩日仔白色个山薑花頂背會有一條一條个青線，像係有人去畫佢樣仔，看起來異趣妙！

等到盞仔肚个山薑花做下謝忒，花就落落跌，錫一陣蛇仔來食，搥到歸桌仔局局糟糟，阿姆就會喊佢拿去焗忒做肥料。在火

影肚，像看得著該兜山薑花綻筍、抽長、生葉、開花、謝忒、做肥，過咧佢兜精彩个一生。

東勢多山，種當多竹仔，絹粽仔毋係用麻竹葉就係用桂竹殼。毋過聽講新竹有人用山薑花个根、莖晒燥研粉，連同山胡椒、香菇、豬肉、蘿蔔乾同糯米共下蒸畀熟，過乜用山薑花个葉仔來絹粽仔，安到「野薑花粽」。有一擺去新竹遶寮，看著路脣有人賣就買來嗒看啊。山薑花葉裡肚包个像係油飯，正落嘴个時節無鹹無纖²，毋過緊噉緊香，淡淡个花香味緒囡在糯飯裡肚，口味當清甜。山薑花个葉仔無異大，包个粽仔細細粒仔，一擺愛呷三、四粒正會過願。

想來當打爽，溝肚該畝山薑花，因為這幾年仔水濂淨淨嘎燥死忒。毋過前幾日暗晡在臺北屋下附近仔散步，遠遠嘎鼻著該熟事个清香。順等該香味慢慢仔尋，在山排圳溝脣發現一墩山薑花，開有三、四蕊花來同佢錫過去欣賞厥个風華，也分佢回憶起該無愁無慮个童年。

¹ 畝：音 po'；量詞，株、串。

² 無鹹無纖：音 mo' ham' mo' xiam'；淡然無味。